

妙法蓮花經．觀世音菩薩普門品

鳩摩羅什譯

妙
諦
法
音

南無本師釋迦牟尼佛

自歸於佛 當願眾生 紹隆佛種 發無上意

自歸於法 當願眾生 深入經藏 智慧如海

自歸於僧 當願眾生 統理大眾 一切無礙

妙法蓮花經．觀世音菩薩普門品

請法儀則

爾時，無盡意菩薩，即從座起，偏袒右肩，合掌向佛。

問名緣由

而作是言：世尊！觀世音菩薩，以何因緣，名觀世音？

釋名所以

佛告無盡意菩薩：善男子！若有無量百千萬億眾生，受諸苦惱。

聞是「觀世音菩薩」，一心稱名。觀世音菩薩，即時觀其音聲，皆得解脫。

脫瞋火難

若有持是「觀世音菩薩」名者，設入大火，火不能燒。由是菩薩威神力故。

脫貪水難

若為大水所漂。稱其名號，即得淺處。

脫癡風難

若有百千萬億眾生，為求金、銀、琉璃、硨磲、瑪瑙、珊瑚、琥珀、真珠等寶，入於大海。假使黑風吹其船舫，飄墮羅剎鬼國。其中，若有，乃至一人，稱「觀世音菩薩」名者。是諸人等，皆得解脫羅剎之難。

以是因緣，名觀世音。

脫刀杖難

若復有人，臨當被害，稱「觀世音菩薩」名者。彼所執刀杖，尋段段壞，而得解脫。

脫非人難

若三千大千國土，滿中夜叉、羅刹，欲來惱人。聞其稱「觀世音菩薩」名者。是諸惡鬼，尚不能以惡眼視之，況復加害！

脫檢繫難

設復有人，若有罪、若無罪，杻械枷鎖檢繫其身。稱「觀世音菩薩」名者。皆悉斷壞，即得解脫。

脫怨賊難

若三千大千國土，滿中怨賊。有一商主，將諸商人，齎持重寶，經過嶮路。其中一人作是唱言：「諸善男子！勿得恐怖。汝等應當一心稱『觀世音菩薩』名號。是菩薩，能以無畏施於眾生。汝等若稱名者，於此怨賊，當得解脫。」眾商人聞，俱發聲言：「南無觀世音菩薩」。稱其名故，即得解脫。

無盡意！觀世音菩薩摩訶薩，威神之力，巍巍如是。

離三毒

若有眾生，多於婬欲。常念恭敬觀世音菩薩，便得離欲。

若多瞋恚。常念恭敬觀世音菩薩，便得離瞋。

若多愚癡。常念恭敬觀世音菩薩，便得離癡。

無盡意！觀世音菩薩有如是等大威神力，多所饒益。是故，眾生常應心念。

應二求

若有女人，設欲求男。禮拜供養觀世音菩薩。便生福德、智慧之男。

設欲求女。便生端正、有相之女，宿植德本，眾人愛敬。

無盡意！觀世音菩薩，有如是力。

勸持聖號

若有眾生，恭敬禮拜觀世音菩薩，福不唐捐。

格量功德

是故，眾生皆應受持「觀世音菩薩」名號。

無盡意！若有人，受持六十二億恒河沙菩薩名字，復盡形供養飲食、衣服、臥具、醫藥。

於汝意云何，是善男子善女人，功德多不？

無盡意言：甚多，世尊！

佛言：若復有人，受持「觀世音菩薩」名號，乃至一時，禮拜供養。

是二人福，正等無異。於百千萬億劫，不可窮盡。

無盡意！受持「觀世音菩薩」名號，得如是無量無邊福德之利。

說法方便

無盡意菩薩白佛言：世尊！觀世音菩薩，云何遊此娑婆世界？云

何而為眾生說法？方便之力，其事云何？

佛告無盡意菩薩：善男子！若有國土眾生：

應以佛身得度者。觀世音菩薩，即現佛身，而為說法。

應以辟支佛身得度者。即現辟支佛身，而為說法。

應以聲聞身得度者。即現聲聞身，而為說法。

應以梵王身得度者。即現梵王身，而為說法。

應以帝釋身得度者。即現帝釋身，而為說法。

應以自在天身得度者。即現自在天身，而為說法。

應以大自在天身得度者。即現大自在天身，而為說法。

應以天大將軍身得度者。即現天大將軍身，而為說法。

應以毘沙門身得度者。即現毘沙門身，而為說法。

應以小王身得度者。即現小王身，而為說法。

應以長者身得度者。即現長者身，而為說法。

應以居士身得度者。即現居士身，而為說法。

應以宰官身得度者。即現宰官身，而為說法。

應以婆羅門身得度者。即現婆羅門身，而為說法。

應以比丘、比丘尼、優婆塞、優婆夷身得度者。即現比丘、比丘尼、優婆塞、優婆夷身，而為說法。

應以長者、居士、宰官、婆羅門婦女身得度者。即現婦女身，而為說法。

應以童男、童女身得度者。即現童男、童女身，而為說法。

應以天、龍、夜叉、乾闥婆、阿修羅、迦樓羅、緊那羅、摩睺羅伽，人、非人等身得度者。即皆現之，而為說法。

應以執金剛神得度者。即現執金剛神，而為說法。

勸導供養

無盡意！是觀世音菩薩，成就如是功德。以種種形，遊諸國土，度脫眾生。

是故，汝等應當一心供養觀世音菩薩。

號施無畏

是觀世音菩薩摩訶薩，於怖畏急難之中，能施無畏。

是故，此娑婆世界，皆號之為「施無畏者」。

依教奉供

無盡意菩薩白佛言：世尊！我今當供養觀世音菩薩。

謙不受供

即解頸眾寶珠瓔珞，價值百千兩金，而以與之。

重請受供

作是言：仁者！受此法施珍寶瓔珞。

佛示受意

時，觀世音菩薩，不肯受之。

無盡意復白觀世音菩薩言：仁者！愍我等故，受此瓔珞。

爾時，佛告觀世音菩薩：當愍此無盡意菩薩，及四眾，天、龍、夜叉、乾闥婆、阿修羅、迦樓羅、緊那羅、摩睺羅伽，人、非人等故，受是瓔珞。

借供獻佛

即時，觀世音菩薩，愍諸四眾，及於天、龍，人、非人等，受其瓔珞。分作二分。一分奉釋迦牟尼佛，一分奉多寶佛塔。

總結化緣

無盡意！觀世音菩薩，有如是自在神力，遊於娑婆世界。

偈頌重問

爾時，無盡意菩薩以偈問曰：

世尊妙相具 我今重問 彼佛子何因緣 名為觀世音

偈頌略答

具足妙相尊，偈答無盡意：

汝聽觀音行 善應諸方所 弘誓深如海

歷劫不思議 侍多千億佛 發大清淨願

我為汝略說 聞名及見身 心念不空過 能滅諸有苦

假使興害意 推落大火坑 念彼觀音力 火坑變成池

或漂流巨海 龍魚諸鬼難 念彼觀音力 波浪不能沒

或在須彌峯 為人所推墮 念彼觀音力 如日虛空住

或被惡人逐 墮落金剛山 念彼觀音力 不能損一毛

或值怨賊繞	各執刀加害	念彼觀音力	咸即起慈心
或遭王難苦	臨刑欲壽終	念彼觀音力	刀尋段段壞
或囚禁枷鎖	手足被杻械	念彼觀音力	釋然得解脫
呪詛諸毒藥	所欲害身者	念彼觀音力	還著於本人
或遇惡羅刹	毒龍諸鬼等	念彼觀音力	時悉不敢害
若惡獸圍繞	利牙爪可怖	念彼觀音力	疾走無邊方
虵蛇及蝮蠍	氣毒煙火燃	念彼觀音力	尋聲自迴去
雲雷鼓掣電	降雹澍大雨	念彼觀音力	應時得消散
眾生被困厄	無量苦逼身	觀音妙智力	能救世間苦
具足神通力	廣修智方便	十方諸國土	無刹不現身

種種諸惡趣	地獄鬼畜生	生老病死苦	以漸悉令滅
真觀清淨觀	廣大智慧觀	悲觀及慈觀	常願常瞻仰
無垢清淨光	慧日破諸暗	能伏災風火	普明照世間
悲體戒雷震	慈意妙大雲	澍甘露法雨	滅除煩惱焰
諍訟經官處	怖畏軍陣中	念彼觀音力	眾怨悉退散
妙音觀世音	梵音海潮音	勝彼世間音	
是故須常念	念念勿生疑		
觀世音淨聖	於苦惱死厄	能為作依怙	
具一切功德	慈眼視眾生	福聚海無量	是故應頂禮

法會圓滿

爾時，持地菩薩即從座起，前白佛言：世尊！若有眾生，聞是觀

世音菩薩品自在之業普門示現神通力者。當知：是人，功德不少。

佛說是〈普門品〉。

時，眾中八萬四千眾生，皆發無等等阿耨多羅三藐三菩提心。

妙法蓮花經．觀世音菩薩普門品

觀音大士 悉號圓通 慈悲大願誓弘深 苦海渡迷津 救苦尋聲 無刹不現身

南無觀世音菩薩摩訶薩

無上妙法喜見聞 菩薩德行作楷模 福增慧長災障除 咸共眾生成佛道

受持及讀誦 讚歎並宣說 福慧俱增長 災障悉消除 現眷咸安康 先親得超昇 見聞與隨喜 皆共成佛道

⑧

①普者，普周。門者，開通無滯，能入能出。入，上求佛道；出，下化眾生。

②受此法施珍寶瓔珞 受此依教依法，以珍寶瓔珞布施供養。

③一心稱名 一心，不但指專心，更指同一類之心。喻如磁石只能吸鐵，而非金銀珍寶。以觀世音菩薩之慈悲德行為修持楷模。事上，感應菩薩救苦；理上，修學菩薩德行。有如是因，感如是果。事理圓融，方得感應道交。

慈悲德行，為稱念觀世音菩薩聖號之代名詞。例如：

救火難。事，免外火燒害。理，由慈悲力，息滅內在瞋恚火。

刀杖難。事，免刀杖所傷。理，由慈悲力，於色聲六塵境，離貪瞋癡。

檢繫難。事，免手銬腳鐐。理，由慈悲力，去除名缰利鎖。

勸諭發菩提心，上求佛道，下化眾生，奉菩薩慈悲德行作楷模，可冀福增慧長，災消障除。



妙法寺 香港新界屯門藍地

🌐 mfbm.hk